

Н е р т ä з а г ь с ч н р

Каспийск района загъсчнр дунд кӧдлмшин дамшлтар нернь туурсн загъсчнрин тонь цӧн биш. Эднә негнь — Зубковин ӧрк-бӱл.

Зубков Герасим Павлович — 50 гар джилд Кӧк тенъгст загъс анънллгънд кӧдлӧд, 1957 джилд амрлгънд гарв. Ода энӱнә кӧвӱнь П. Г. Зубков «Каспиец» колхозин ставной шӱӱгӱлин звеньевоӱ болдж кӧдлджанә. Энӱнә звено 1958 джилин тӱрӱн ӧрӧлд хойр джилӧ зура давулдж кӱцӧв, орн-нутгтан 1560 центнер загъс орулдж ӧгв. Эн звенод М. Г. Зубков, дакад эн ах-дӱ хойран кӧвӱд Михаил, Александр хойр бас йовна.

Эн нертӧ загъсчнр сӱӱлин джилмӱдт данъгин зурагъан давулдж кӱцӧдж йовб. Эдн ода тӱрӱ-зӱдӱ уга, бӧӧхтӧ

джиргълӧр бӧӧцхӧнә. Эннь — кӱч-кӧлсӧн тӧрскн колхозан батлхин тӧлӧ хармилго ӧгч йовдгин ашнь болджана. Эн джилин хаврин путинд П. Г. Зубковин звенон загъсч болгън 13 минъгъӧд арслнь шинъгӧв.

Ода П. Г. Зубковин звено намрин путинд загъс анънллгънд гархдан белн. Сав, гӧлмурхнь ясгдад дуусгдчкв. Шидр звенод производственн совещань болсн — загъсчнр Тӧрскндӧн 429 центнер загъс орулдж ӧгх болдж даалгъвр авб, эннь зурагъасн 100 центнер ӱлӱ.

Кӧгшин загъсч П. Г. Зубковин кӧвӱднь, ачнрнь энӱнә неринь туурадж, седклинь байрлулдж, бийсиннь нерӧн чигн гаргъдж йовна.

С. - Г. ГОШЕНДАНОВ.